



Sibertus de Becka in Geldria natus et educatus est. Is foelici ingenio praeditus diligentem operam literis nauauit, atq; magnam eruditionem acquisiuit. Erat enim in diuinis scripturis doctissimus, atq; in iure Canonico & Aristotelica doctrina insigniter peritus. Nec minus etiam pia conuersatione & dexteritate quam scientia suo tempore erat conspicuus. Hinc factum ut ordinis beatae Mariae semper uirginis de monte Carmeli prior Prouincialis, per inferiorem Germaniam, electus fuerit. Cum autem is intellexisset, ordinem suum a uero tramite declinasse, ipsum ordinale (quod uocant) sui ordinis sagaci intentione correxit, Anno

Domini millesimo trecentesimo uicesimo, scripsit etiam super sententias, atque Censuram noui Iuris. Atque post uarias lucubrationes in patria obiit. Trithemius.